

Martullo vul resguardar dapli las differenzas regiunalas

Moziun da cussegliera naziunala Magdalena Martullo

■ (mc) Il chantun Grischun è ferm per tutgà e perquai in summa betg inchantà da l'obligaziun d'annunziar plazzas libras ch'è vegnida introducida avant passa in onn. Cun ina moziun vul cussegliera naziunala Magdalena Martullo (pps GR) ussa schlucclar quest'obligaziun cun resguardar dapli las differenzas chantunalas e regiunalas. Cun sia moziun vul *Magdalena Martullo* per quei regionalisar l'obligaziun d'annunziar plazzas libras en connex cun la quota da dischoccupaziun. Il cussegl federal duai vegnir incaricà d'adattar l'ordinaziun davart l'intermediaziun da la lavur e l'emprest da persunal en quest senn. Relevanta per l'obligaziun d'annunziar plazzas libras na duai betg la quota da dischoccupaziun eruida per l'entira Svizra esser, mabain la quota regiunala u chantunala d'ina sparta professiunala. Plinavant saja l'obligaziun d'annunziar plazzas libras da limitar geograficamain sin regiuns u chantuns nua che la quota da dischoccupaziun cuntanscha u surpasa ina limita definida. Questa limita duai vegnir fixada dal Departament federal per economia, furmaziun e perscrutaziun mintg'onn en il decurs dal quart quartal per l'onn proxim. En quest con-

nex duain era vegnir definidas tge spartas professiunalas che vegnan sutmessas en tge regiuns u chantuns a l'obligaziun d'annunzia.

Manchentà d'exequir l'iniziativa cunter l'immigraziun da massa

Sco quai che Martullo accentuescha han cussegl federal e parlament manchentà d'exequir la voluntad da l'iniziativa populara «cunter l'invasiun da massa», inoltrada da la pps. Enstagl è vegnida introducida l'obligaziun d'annunziar plazzas libras en branschas cun ina quota da dischoccupaziun surproporziunala. Quest instrument n'haja dentant betg pudì franar ni l'enorma immigraziun ni sias consequenzas negativas sin l'economia e sin la populaziun, punctuescha Martullo. Il cuntrari: Ils tschains d'affittaziun sajan creschids, la quota da dischoccupaziun a lung termin e da persunas pli veglias senza lavur medemamain. Era la criminalitad saja creschida, pretenda Martullo. Plinavant hajan ins creà cun questa regulaziun in'ulteriura fanestra birocraica.

Grondas mancanzas tar l'applicaziun pratica

Plinavant dettia grondas mancanzas tar l'applicaziun pratica da l'obligaziun d'annunzia. Tar la quota da dischoccupaziun da singulas branschas na prendian ins nagin resguard da las differenzas chantunalas e regiunalas. Actualmain stoppian plazzas libras en ils chantuns ed en las regiuns vegnir annunziadas als posts per intermediaziun da lavur. Regiuns cun ina bassa quota da dischoccupaziun en ina bransch obligada a l'annunzia vegnian uschia sut las rodas. Ina differenziaziun regiunala u chantunala da l'obligaziun d'annunzia fissia pli efficienta, è Martullo persuadida. Las datas correspondentas sajan numnadamain gia avant maun. Sin il portal da plazzas da la confederaziun possian ins examinar schebain ina plazzu è sutmessada a l'obligaziun d'annunzia u betg. En l'avegnir stuessian ils patrunes sulettamain inditgar il numer postal sper la professiun tshertgada. Questa nova reglamentaziun correspundia dal reminent er a l'artitgel 21a da la lescha che pretenda che las plazzas libras en spartas professiunalas da las regiuns economicas cun ina procentuala da dischoccupaziun sur la media vegnian annunziadas.



Cunzunt en la gastronomia chaschuna l'obligaziun d'annunziar plazzas libras ina gronda lavur supplementara senza in niz concret. MAD
